

VAZ

Nova canzlista pigl cumegn da Vaz

Successoura digl canzlist partent *Johann Gruber* davainta *Jeanne Richenberger*. Ella antscheva la sia nova plazza cun l'antschatta da favrer 2022. Digls set cumejns dalla regiun Alvra è igl cumejgn da Vaz igl pi grond chegl tgi pertotga igl domber dalla populaziun ed er digls votants e dallas votantas (1900 persungas cujl dretg da votar). Igl cumejgn è er en grond patruing cun dar labour a passa 150 persungas, chegl inclus scolasts e scolastas. La canzleia chella sa catta a Lai e chegl aint igl bietg communal, noua tgi tots igl uffezis èn er sot tetg. Siva tgi igl canzlist actual *Johann Gruber* è inoltra la sia demissiuin è igl cumejgn da Vaz ia alla tschertga d'en successour u d'ena successoura. Da menziunar è tgi igl canzlist partent è sto 14 onns en canzlist fido e serious. Pigl post da scribent da cumejgn e la sia successiuin èn s'annuztgeidas ples persungas, uscheia tg'ins è gia ena pi gronda schelta. La suprastanza digl cumejgn da Vaz è alloura sa decideida per *Jeanne Richenberger* scu nova canzlista. La donna tgi magna da preschaint igl uffez cantunal dalla fiera da labour digl cantun Glarunga è 44 onns, è stibgia scienza ed è er futura giurista. Ella dereiva digl cantun Lucerna e canoscha er la regiun da vacanzas da Lai cun aveir igl sies seir dimora aint igl cumejgn da Vaz. *Jeanne Richenberger* sa legra da scumanzar an 14 emdas la sia nova labour. *Johann Gruber* vign a bandunar igl cumejgn da Vaz igl mez da mars 2022 siva tgi la fasa da sa luvrar aint dalla nova canzlista è a fejn. *Jeanne Richenberger* è ena skiunza ferventa, ella fò gugent turas da skis e viandar e karate totgan er tigl sies hobis. Tranter oter è la donna er mano cun en'ameia la tgamaona Rotondo digl Club alpin svizzer tgi sa catta aint igl cantun Uri. (fmr/gns)

La nova canzlista digl cumejgn da Vaz, *Jeanne Richenberger*.

FOTO MAD

HOCKEY

Siva 13 minutas gio decida

Las ampremas 30 minutas digl gi è igl adversari dalla Nagiadegna bass ple u manc sto inexistent. Igls indigens persiva èn sa preschentos dalla lour miglra vart e gist marco set gols. Siva da lò on er igls Valladers scumanzo a dar a hockey.

Igl Club da hockey Engiadina è aglmanc segl palpieri betg blier pi fivel tgi igl Club da hockey Lai/Valbella. Uscheia era da spigtier ena parteida pitost angulivada aint igl amprem derbi grischun digl campiunadi actual dalla 2. liga. Derbis procuran er adegna per ena tscherta tensiuin, vogl savens berg angal per puncts, mabagn er pigl prestige. An minga cass aint igl derbi Lai/Valbella cunter Engiadina ins è igls davos onns darar vasia tgi igls Engiadines èn stos schi inabels da giuier a hockey, scu sonda passada, cun accentuaziun sen las ampremas 30 minutas digl inscunter.

Treis gols da Ramon Pfranger

La «gala» da Lai/Valbella è gio scumanzo siva da 13 secundas tgi igl arbiter è do l'antschatta agl derbi. *Livio Roner* è signia igl 1:0 e chegl an cumbinaziun cun *Ramon Pfranger*. Dus minutas sessour è igl madem giuieder fatg igl 2:0 e chegl danovamaintg sen pass digl sies amei da squadra e capitani digl team indigen. Curt sessour è reuschia a *Ramon Pfranger* da marcar igl terz gol per Lai/Valbella. La «show» digls Surmirans è cuntinuo cun els signier an terma da tschintg minutas gist anc treis gols. Per chels èn stos responsabels *Jan Ferrari*, *Nicola Lenz* e *Ramon Pfranger*. Cugl resultat intermediar da 6:0 siva 13 minutas dalla parteida era chella ple u manc decideida. Siva d'aveir casso an schi curt taimp gist seis gols da fila è *Vanessa Bolinger*, igl goli d'Engiadina, fatg plaz a *Nils Bächler*, igl goli da reserva digls Engiadines. All'antschatta digl sagond terz on igls giasts casso dus casteis e cun chels er gist igl 7:0, marco puspe da *Ramon Pfranger*, el tg'è nia d'Arosa a Lai ed è en grond gudogn pigl club da Surmeir. Sa tgapescha tgi siva da chel cler avantatg è l'equipa indigena betg ple giuia schi concentro, persiva da lev senn e cun far successiv en sbagl sen l'oter. La consequenza da tschassar tempo e motivaziun è stada tgi Engiadina è fatg treis gols e domino cler igl davos terz digl gi. Graztga allas paradadas miraculosas digl goli *Leon-Vincent Sarkis* è Lai/Valbella betg retschet anc daples gols digls Valladers. (fmr/gns)

Lai/Valbella-Engiadina 7:3 (6:0, 1:1, 0:2)

Lai/Valbella: *Leon-Vincent Sarkis*, *Yasin Agha*, *Nidal Agha*, *Lars Egli*, *Raoul Dänser*, *Orlando Scherz*, *Enzo Monstein*, *Livio Roner*, *Christian Litscher*, *Maurus Caffisch*, *Yannick Bruderer*, *Ramon Pfranger*, *Jan Ferrari*, *Marc-Cola*, *Dario Litscher*, *Nicola Lenz*.

Igl gi auditiv «Porchabella – der Vogel Freiheit» magna da Chants anfignen tigl Vadret da Porchabella.

FOTOS SANDRA BALZER

Porchabella – en gi auditiv per tot igls senns

Dacurt è nia preschento igl gi auditiv «Porchabella – der Vogel Freiheit». Chel accumpogna viandantas e viandants sen ena spassageda da Chants anfignen tigl Vadret da Porchabella. L'istorgia drammatica sa basa per part sen fatgs reals e po tschiffar – pero angal viandants bagn preinfurmos. La FMR è fatg en test digl gi auditiv e dat en resung.

SANDRA BALZER/FMR

Igl onn 1992 è igl Vadret da Porchabella – tgi sa catta agl nord digl Piz Kesch – do liber ena bara d'ena donna. Examinaziuns on musso tg'ella purtava en mantel digl taimp anturn 1700. Tge è mano la donna tranter 25 e 30 onns da lez taimp segl Vadret da Porchabella? «Porchabella – der Vogel Freiheit» sa nomna igl gi auditiv tgi elaborescha chella cattada litteraricamaintg. Camilla sa nomna ella aint igl gi auditiv – en pseudonim. Ella cumbatta per ena veta autonoma per donnas e vign spert sintintgeida scu streia. I sa tracta d'ena istorgia davart amour e dolour tranter Camilla alias Apollonia Cleric ed igl sies admiratour *Elis Wachter*. Igl drama istoric d'*Andreas Ulich* magna an oter parts da Chants orase anfignen agl pe digl Vadret da Porchabella.

Igl gi auditiv unescha las differentas «ingredienzas»: fatgs istorics davart la bara digl Porchabella – egna dallas pacas baras femininas d'en vadret ansomma. Pero er igl text istoric «Die ungeplückte und stetsbeglückte Rose der unschätzbaren Freyheit» tgi datescha digl onn 1693 dall'autoura misteriosa Camilla è en fatg istoric tgi gioia ena rolla principala aint igl gi auditiv. Agl autour ègl gartagea d'uneir chels fatgs istorics, persecuziun da streias e fantascheia. Reuschia è en drama istoric tgi lascha amblidar igl viandant igls 800 meters d'otezza tg'èn da survantscher.

Accumpagnea vign igl gi auditiv da musica e ramours tgi intensive-schan l'aventura e dattan bunamaintg en sentiment d'esser part digl drama d'avant 300 onns. Er la culissa dallas oter staziuns porscha en evenimaint unic. Igl pi tard sch'ins sa catta alla davosa staziun cumpara igl Vadret da Porchabella ed igl auditour para d'esser aspectatour digls evenimaints da lez taimp. Ins spetga bunamaintg tgi Ca-

millia alias Apollonia Cleris vigna proximaintg respirond ancunter. Dantant stat igl conturn dallas staziuns betg an direct connex cun las singulas parts auditivas, uscheia tg'igl è da cunsigliar, da tadlar minga part auditiva sch'ins tgamina tar la proxima staziun. La distanza d'ena staziun tar la proxima vo bagn a pro cun igl taimp tg'ins dovra per tadlar ena singula part. Igl gi scu antier magna igl auditour cun en'istorgia drammatica agl li noua tg'igl punct culminont gioia – igl Vadret da Porchabella. Anfignen alla fejn spetga igl auditour sen la schliaziun e raspostas sen dumondas centralas scu per exaimpel «Tgi è tgiso Apollonia Cleris?». Dantant lascha igl autour spazi per interpretar e perscrutar anavant istoricamaintg davart la bara digl Porchabella u igl text istoric digl 1693.

L'istorgia tschiffa e plai, pero l'explaziun ed instruziun per igl/la viandant/a mantga en zichel. Las singulas staziuns èn andrizzadas simplas: En pal da lenn cun ena tavletta tgi porta l'inscripziun «Porchabella» ed igl nomer dall'episoda correspondent. Igl visitader tschertga sainza resultat ena tavla d'introducziun u ena declaraziun da-

vart las pitgas da lenn. Ed uscheia restan las oter pitgas per en viandant tgi è nignas infurmaziuns exact uscheia misteriosas scu la bara digl Porchabella u la Camilla digl 17avel tschentaner.

Igl dat er nigra reit tranter Chants ed igl Vadret da Porchabella ins stò carger giu las parts auditivas davantor. Ultra da chegl dattigl nign'indicaziun davart l'amprema tavla tgi sa catta curt siva las davosas tgesas a Chants.

Po dar tgi tot chellas instruziuns èn pitost manglousas. Tgi tgi s'infurmescha pero ordavant, cargia giu las oter episodas davantor e catta gl'amprem pal, chel spetga en drama istoric, accumpagnea da musica e ramours tgi von bagn a pro. E tgi tgi tschiffa forza schizont ora surtratga, cun en po vent ed en pèr minas da neiv, chel sa catta anmez en'istorgia drammatica d'avant 300 onns tgi po neir percepeida cun tot igls senns.

Igl è da chintar cun radond 2,5 ouras excursiun (plus 2 ouras pigl return). Tgi tgi vot carger giu las episodas auditivas po far chegl sot <https://www.parc-ela.ch/de/naturpark/kultur/porchabella-vogel-freiheit>



Agl Vadret da Porchabella gioia igl punct culminont digl gi auditiv. Cò sa catta er la davosa staziun digl gi auditiv.